

Ўзбекистон Республикаси Мустақиллик куни — 1991 йил 1 сентябрдан чиқа бошлаган

Муассислар: Ўзбекистон Республикаси Хотин-қизлар қўмитаси, Болалар жамғармаси ва «Соғлом авлод учун» Халқаро хайрия жамғармаси

## ЎТАЁТГАН КУНЛАР ШУКУҲИ



Адолатхон дўппи тикса, йигит гулга айланар,  
Зухроларнинг кўнгиллари ипак бўлиб бойланар.  
Хонатласдан кўйлак тикса, кийган Барчин қизларнинг  
Самбит қоматлари расо, юзи қирмиз, ойланар.

Суратда: марғилонлик чевар  
Адолатхон Гуломова

Дунёда байрамлар куп. Байрамлардан байрамларнинг фарқи куп. Турган гап, ҳаммасининг ҳам узига яраша шукуҳи, сурури бор. Аммо моҳияти битта: улар қандай санага бағишланишидан, қачон, қасрда, қай тарзда нишонланишидан қатъи назар, фақат бир нарсага хизмат қилади. Аниқроғи, ҳаммаша кишиларга шодлик келтиради, кекса-ёшни мудом хайрли ишларга илҳомлантиради. Ва яна: эзгуликнинг баҳоси, савобнинг ниҳояси булмаганидек, қўтлуг айёмларнинг ҳам яхши-ёмони, қувончнинг катта-кичиги бўлмайди. Шу боис муайян бир миллат ёки халқнинг байрамидан бошқалар ҳам қувонади, узгалар ҳам бахраманд бўлади. Негаки, инсониятнинг азалий одати шу: у дунёга келибдики, доимо бир-бирига яхшилик, бахт-саодат соғиниб яшайди. Бундай соф ниятли одамлар эса албатта тинчлик-озодлик ошини ошайди.

Мана, узимиздан қиёс. Илк кукламининг бошида кўплар қатори биз ҳам халқаро Хотин-қизлар куни — 8 мартни шоду хуррамлик билан кўтиб олдик. Айём баҳона оналаримизга, опа-сингилларимизга, жамики аёлларимизга ҳар қачонгидан да чуңроқ иззат-ҳурмат курсатдик. Таъбир жоиз бўлса, гуллари-мизга гуллар тутқаздик. Меҳрдан меҳр униши, эзгулик эҳтиромдан бошланиши рост экан. Удуг зотлар айёми ҳаял утмай миллий байрамимиз — Навруз тантаналарига улашиб кетди. Бутун борлиқни иликузилди дамларнинг тансиқ таоми — сумалаклар ҳиди тутди. Шу асно кимлардир яхши ният, эзгу тилак-ла далаларга уруғ себди, кимлардир боғ-роғларга янги кучат экди. Бошқа биров, жилла курса, хонадонни ен-атрофини тартибга солди, нима булган-даям, эл-юрт дуосини олди.

Кечаги ҳафта эса, биз яна бир қўтлуг санани кенг нишонладик. Дунё мусулмонлари сингари Қурбон ҳайитини росмана байрам қилдик. Сабабини узингиз яхши биласиз. Бу ҳайит ҳам ийд-Рамазон янглиғ аҳли ҳиминларнинг энг муқаддас байрами ҳисобланади. У аслида кўнгил мулкларининг байрами,

том маънода тинчлик-тотувлик, дустлик-биродарлик, узаро ҳамжиҳатлик ва шукроналик айёмидир. Инчунун, бу кунларда инсоний фазлу қарамлар, бебаҳо қадру қимматлар, боқий меҳру муруватлар, барқарор шафқату марҳаматлар тула-туқис руюбга чиқади. Тонгда бошланган тоат-ибодатдан сунг одамлар бир-бирларини байрам билан қўтлайдилар. Хаста-ю ногиронларни, бева-бечораларни, етим-есирларни йўқлаб, кўнгилларини кутарадилар. Кексаларни, табарруқ ёшли бобо-момоларни зиярат қиладилар. Утганлар хотирасини ёдга оладилар. Сунгра савобларга йўрилган айёмни шоду хуррамлик, уйинкулги ила давом эттирадилар.

Жумҳуриятимиз раҳбариятига минг раҳмат! Исломиий қадриятларнинг узига хос жиҳатларига жиддий эътибор қаратди. Худди қайта тикланган Навруз сингари ийд-Рамазон ва Қурбон ҳайитларини ҳам умумхалқ байрами сифатида эълон қилди. Муборак Ҳаж сафарига борувчилар учун ҳам моддий, ҳам маънавий шарт-шароитларни муҳайё этди. Утган ҳафта нишонланган Қурбон ҳайити бу ҳақдаги қарору Фармонлар нақадар улугвор, мангуликка нақадар даҳлдор эканлигини курсатди. Бу шодисналарга буюк бобокалонимиз Амир Темурнинг таваллуд куни тантаналари улашиб кетгани, юзлаб-минглаб ҳамюртимиз икки миллиондан ортиқ ҳожилар сафида Маккани тавоб этгани шубҳасиз, нур устига нур бўлди.

Қаранг, бир ойнинг нари-берисида қанча байрамнинг, қанча шодлик-хуррамликнинг, қанча яхшилиги эзгуликнинг гувоҳи бўлибмиз. Бас, шундай экан, келинг, утаётган кунларимизга шукроналар келтирайлик, биргалашиб дуога қўл очайлик:

Илоё, байрамларимиз куп бўлсин, имонимиз бут, ниятларимиз хуб бўлсин!

Юртимизга бало-офатлар доримасин, хонадонларимиздан бахт-саодатлар ари-масин!

Абдунаби ҲАЙДАРОВ

## МУРУВВАТ КЎРСАТИБ

Халқимизда меҳру — мурувватга муҳтож инсонларга ёрдам бериш азалий удумларга айланиб қолган. Бу анъана бугунги кунда ҳаётимизга янада чуқур сингиб бормоқда.

Яқинда Тошкент шаҳар «Навруз» хайрия, «Меҳр-шафқат ва саломатлик» жамғармаси ва хотин-қизлар қўмитаси

ҳамкорлигида пойтахт туманларида яшовчи 3 ёшдан 10 ёшгача бўлган 60 та боланинг суннат тўйларига бағишланган тадбир ўтказилди.

Тошкент шаҳар ҳокимининг биринчи ўринбосари Адҳам Миржалолов тадбирни очиб тўй болаларнинг ҳар бирига 2000 сўмдан

қўйилган имтиёзли омонат дафтарчаларни топширди. Шунингдек, болаларга ўқувчилар папкаси, ўқув қуроллари тўплами, кийим-кечаклар, турли ширинликлар ва ўйинчоқ эсдалик совғалари берилди.

Тадбирнинг файзли ўтишида таниқли санъаткорларнинг хизматлари катта бўлди. Мирза Хол-

медов, Абдулҳай Каримов, Сайёра Қозиева каби халқимизнинг сеvimли хонандалари ижро этган кўшиқлар иштирокчиларга завқ-шавқ бағишлади. Айниқса, республика «Томоша» театрлаштирилган болалар гуруҳи намойиш этган мусиқали сахна кўринишлари томошабинлар олқишига сазовор бўлди.

ЎЗ МУХБИРИМИЗ















